

張文襄公電奏

張文襄公全集卷七十六

電奏四

致總署天津李中堂

光緒二十年七月初十日亥刻發

南洋轉傳初四日電旨恭悉江防聯爲一氣自應欽遵辦理竊思南洋所重惟在江陰鎮江兩處礮臺實爲長江全局門戶至江南陸勇本有數十營如有不敷江西安徽鄰省調撥較便添募亦易湖北現籌江防營勇過單如江南有需鄂省協助之處當隨時與江督劉電商辦理斷不稍存畛域惟屢接津電我軍赴朝鮮者約二萬人防營頗單亟需填劄畿輔門戶不宜空虛深爲馳

系似目前情形北洋需陸營爲急查湖北提督吳鳳柱
係淮軍宿將襄陽現有馬隊三營共五百名擬令該提
督統帶馳赴天津聽候北洋大臣調遣鄂省當酌量另
募填劄謹電請代奏候旨遵行之洞繼洵同肅蒸一

致總署

光緒二十年七月初十日亥刻發

奉旨各省聯爲一氣以固江防自應欽遵現擬委臬司
陳寶箴卽日乘輪馳赴江甯與江督劉籌商一切不過
旬日卽回請代奏之洞繼洵同肅蒸二

致總署

光緒二十年七月十二日戌刻發

本日之洞繼洵乘輪同赴田家鎮相度礮臺地勢沿江

情形明晚卽回省請代奏聞之洞繼洵同肅文

致總署

光緒二十年七月十九日亥刻發

湖北吳提督鳳柱遵旨帶營北上查襄陽楚豫邊界伏莽素多馬隊全營調出亟需大員鎮攝自應奏委專員接署提督以重邊境查有宜昌鎮總兵傅廷臣樸實勤奮且前湖北提督傅振邦威望素優軍民猶有遺愛傅鎮卽係其姪擬請委署提篆必能得力此事照常例本應摺奏惟摺回奉旨再行委署爲時過久未敢拘泥謹電奏請旨如蒙俞允卽飛檄飭遵至吳提督已電告迅將分防隊伍調齊卽行部署啟程提印暫交中軍封存

矣請代奏效

致總署

光緒二十年七月二十三日亥刻發

津防緊要上勞宵旰自宜厚集兵力爲備惟與洋人戰
募勇非難軍火爲難若無精械雖多無益此時無從購
械竊思廣西右江鎮總兵張春發廣東署高州鎮記名
提督潘瀛皆光緒十一年在鎮南關立功知名者兩處
現無要事似可令張春發潘瀛各募勇三數營廣西南
甯府及蘇提督營後膛槍尙多張春發軍可由桂撫蘇
軍撥給千五百枝廣東精械不乏潘瀛軍可由廣東撥
給千二百枝中越界上目前必無戰事械可徐補其餉

應如何墊給數月應候朝廷裁度廣西軍由水路經湖
南至武昌廣東軍由水路經江西至九江再陸行北上
張潘兩鎮或現募或酌撥蘇軍及粵軍老勇本省另募
填劄成軍較速應聽自酌兩將皆曾經洋戰又攜利械
較有實濟此外如貴州安義鎮總兵蔣宗漢戰南關立
功貴州古州鎮總兵丁槐攻宣光屢勝雲南已革總兵
覃修綱隨雲督岑戰洋人獲勝皆係知名之將曾經洋
戰熟悉洋槍地營者皆無要事此三員如朝廷以爲可
用或電飭調取令其酌帶將弁親兵數十人迅速北來
至近省再募勇亦可備緩急到鄂時視北洋南洋何處

急需陸勇或北上或東下臨時請旨遵行張潘蔣三鎮之長問李撫秉衡可悉再制敵必宜先知敵情查道員袁世凱久在朝鮮道員現充新嘉坡總領事黃遵憲久在日本著有成書均係才具優長深悉倭事可否電調該二員到京詳詢情形則倭人虛實短長瞭然易籌攻守之策聞洋人言倭近日多備陸軍其意叵測管見敬陳是否可行謹備朝廷裁擇請代奏漾

致總署

光緒二十年八月初十日未刻發

頃護湘撫王廉咨據魏光燾呈奉旨募勇事不宜遲該藩司擬趕於長沙寶慶湘鄉一帶召集劉錦棠舊部刻

期成軍惟該藩司丁憂未滿三年例得援請終制懇代
奏請另行簡員統帶北上該藩司俟服闋卽當泥首闕
廷不敢稍耽安逸至奉旨募勇未定營數應否募成十
營按湘軍營制每月除器械外約需銀三萬兩請籌撥
的款至槍礮必需利器應如何籌撥并請代奏辦理等
語王護撫并稱湘省奇絀暫挪款三萬籌備魏軍行糧
將來餉項萬難應付等語查湖北現辦江防尤爲匱絀
正在十分爲難僅能勉提庫款二萬暫濟目前前已電
奏以後萬難支應該軍的餉應請敕部迅速籌定的款
電知軍火尤要此時無從購覓湖南湖北均乏精械現

擬由湖北勉力勻撥前膛洋槍一千枝後膛洋槍二百枝并商允南洋大臣劉撥給後膛林明敦洋槍一千枝均配彈藥俾得成行惟不敷尙多可否敕北洋大臣設法量爲籌撥至該藩司應募幾營候旨遵行請代奏蒸

致總署

光緒二十年八月初十日未刻發

倭事恐難速了用兵日久軍火匱乏最爲大患蓋與洋人戰與髮捻不同如無精械雖有猛將強兵亦斷難制勝餉匱猶可力籌械竭無從尋覓實深焦慮洞與出使德國大臣許籌商託其設法在外洋密購軍火現議定有大批精槍一萬三千枝彈六百五十萬顆連珠快礮

八尊彈配足約兩箇月到滬共價約二十四萬兩運費未言須速匯定銀約七萬兩以後全價如何分期付款尙未細述數日內卽有便船可起運等語竊思此乃目前最急之需該價在近日並不爲貴運到後應撥何處請旨撥用事平以後各省均可留用并非虛費仰請朝廷裁度如需購時卽請鈞署電復許大臣定議速運並速電匯銀七萬作定銀以便趕此便船密運其細數許自當咨報洞爲海防大局起見是否可行祈代奏請旨遵行如奉旨後并望密電速示以便知照許蒸

致總署

光緒二十年八月二十七日申刻發

二十三日電旨恭悉詢據許大臣電復各件初二日起
運約兩月內到津尾數俟二批續運等語奉二十一日
電旨催魏光燾當卽飛催尙未接復前數日魏稟云九
月初旬自湘啟行請代奏沁

致總署

光緒二十年八月二十九日卯刻發

湘撫吳奉旨防山海關情形必急吳止帶劉鎮樹元四
營太單雖有他軍不相聯屬查總兵余虎恩向帶振字
三營分防岳長等處余素稱善戰所部係現成之營啟
行較易余新授高州鎮必益感恩圖報擬派現有振字
三營並令余添募兩營迅卽北上赴山海關協防劉樹

元亦令添募一營統歸吳撫節制調遣余與吳撫素洽必得力余劉兩鎮共十營合劄一處氣勢較厚同係湘軍必可同心協力若余分劄他處畸零無益余劉帶現有之營先北上其續募之余兩營劉一營隨後趕往如蒙俞允請敕余虎恩卽回鄂令該鎮一面電知所部營官治裝并電派營官招新勇洞當札催此三營速行請敕湖南護撫遵旨借商款供此軍數月餉以後再請部籌撥軍火略有而未足並請敕北洋添撥足用其振字營防所由湘照數另募填劄請代奏豔一

致總署

光緒二十年八月二十九日申刻發

津防關防遼防均形緊急上勞宸厪謹陳管見五條一
就近募勇魏光燾程文炳及陳湜添募之軍均九月啟
行到防尙早天津民多義勇擊髮逆有效近年習見洋
人槍礮船雷可先募津勇十餘營以習戰營官領之可
爲官軍之助將來易於遣散又宋慶之軍久劄關東與
土人相習旨旣派宋幫辦不如卽令宋就地添募十營
八營遼人素健新勇與老勇相間卽可戰營歸宋募則
宋調度尤順手又東撫李秉衡已到任李樸實無欺深
知營弊可令在豫東選曾經戰陣營官募勇十餘營聽
調較速一戒諸軍堅守穩劄穩打倭氣狂悍又恃械精

利速戰不利持久平壤一役萬衆遽潰由諸軍未經洋戰之故查二三十年來外洋各國陸戰因軍火太猛專恃地營聞洋弁言皆同外洋兵練器精尙專講此事華軍可知滬譯講地營諸書如地壘圖說等京津多有請敕發此書於各營并敕北洋大臣派通曉地營洋弁分往教練數日卽解果能據險堅持兩月倭畏寒必不支我陸軍但能自固倭必不敢越之深入一海軍斷倭後路海軍十八日一戰倭勢頗絀我船宜遊行旅順至鴨綠江一帶倭無船接濟彼陸兵亦難深入一設法購船此時添船爲最急洋人言美洲如秘麥智諸國不甚拘

公法聞近日倭有船來自外洋似亦並無定法擬請敕
出使各大臣及赫德設法密購令他國洋人出名到津
再換中國旗不惜重價當可商購一聯絡各國英忌倭
實忌俄頗祖中國聞德因開戰時倭漏知會亦不悅倭
似宜結約借助倭不允上海爲局外若英能力阻倭擾
吳淞滬局製造軍火不絕滬關稅項不減此兩端已有
大益其餘可隨事獲助俄雖與倭親倭踞朝鮮亦非所
願宜加意聯結若俄稍掣其肘倭兵力自分卽不得力
亦免暗中爲患以上各條明知無補高深時事緊急竭
其愚誠仰候聖明采擇請代奏豔二

致總署

光緒二十年九月初四日丑刻發

時事日急征調繁多各處購覓軍火艱貴非常視爲至寶洞前託許大臣購槍萬餘枝已奏明奉旨運津他省難望分撥方今求一千之槍難於籌十萬之餉洞與許大臣及各洋行密商尙可設法尋購以備各軍急需惟鄂省支絀萬分查宜昌關稅報收約七萬兩向係搭解戶部並無專指用款擬暫借動此項遇有精槍快礮相機購運此外由鄂省籌捐息借應用此項槍礮將來歸何軍用亦難豫定擬俟日後分撥旣畢核其係北上邊防奉調他省諸軍所用者方開支宜昌關之款如係湖

北自用者卽動鄂省籌捐之款再事平以後新購器械
仍可分發各省令其繳價分領洞係爲籌利器濟急需
起見請旨遵行請代奏支

總署來電

光緒二十年九月初十日亥刻到

奉旨戶部遵議張之洞奏請暫借宜昌關稅并籌捐
購買槍礮請准照辦已依議行著張之洞迅速設法
購辦撥運各軍以供急用欽此蒸

致總署

光緒二十年九月初五日亥刻發

奉旨飭調提督熊鐵生帶五營北上當欽遵令其速行
查熊鐵生現督所部各營修田鎮礮臺最爲喫重該提

督全軍驟行過形空虛急須選將募營填割接辦鄂省
將領殊少諳習礮臺講求軍火之員查廣東記名總兵
廣州協副將李先義崖州協副將吳元愷皆係在粵經
手督修大礮臺甚多深練戎機熟習礮法該二員一署
北海鎮一署潮州遊擊均未到本任並無要事已與粵
督李電商擬調來鄂復電均已允許謹請旨准調李先
義吳元愷迅卽來鄂差委於營務防務實有裨益請代
奏歌

致總署

光緒二十年九月初八日已刻發

奉旨令籌撥熊鐵生余虎恩兩軍槍械余十營熊本五

營亦必添數營方能得力鄂省械本少酌量撥給不敷太鉅竊料以後必再有調發經過之軍若待到防再請撥萬萬不妥無械則多營亦無用必須急購萬不可緩鄂省支絀萬分擬請由洞相機隨時訂購暫行借動庫款未敢拘泥貽誤事機請旨敕部一面籌撥的確巨款由部電知鄂省遵辦鄂省四達之區南北適中接濟各路北上之軍甚爲活便總之軍械爲今日第一要事不能惜費但使有款能購已甚不易若稍延誤悔不可追至鄂省防軍自用之械斷不敢請動解部之款迫切瀆陳不勝惶悚待命之至伏候聖裁訓示請代奏庚

致總署 光緒二十年九月初八日午刻發

鐵字五營奉調北上據熊鐵生稟必須十營方成自立
否則與他軍雜湊依附臨戰斷難得力查該提督爲湘
軍健將必令力足方能展布所請添十營似應准行必
可有益且與余虎恩一律鐵營係水陸兼操人數參差
現令將五營均足成整營五營先行添募者繼進所需
餉由鄂暫墊三箇月以後請部撥的款湘軍遠征應照
湘軍營制熊到北防擬請敕歸湘撫吳節制調遣吳撫
粵時熊統粵營今又係湘撫屬吳乃熊所願必能盡力
且可與余劉魏諸湘軍聯絡請旨遵行請代奏庚

致總署天津李中堂湖北提台吳軍門

光緒二十年九月初

九日戌

刻發

聞吳提督鳳柱奉旨赴山海關自係關防喫緊查湖南北募調諸軍一時實難趕到現爲應急之計擬請旨敕該提督就近募天津勇四營以爲所部馬隊之助三日可集本日已匯三箇月餉銀至津并請敕北洋大臣撥給槍械以便迅速馳往請代奏之洞繼洵同肅佳

致總署天津李中堂

光緒二十年九月十五日已刻發

聞倭兵已在旅順後登岸旅順危急此時以保旅順爲第一要著無旅順則無船塢我船不能修從此不能海

戰矣有數船能戰則渝關津沽終可無虞旅順礮臺堅而陸兵少添兵已來不及惟有擬請速頒電旨敕旅順諸將竭力戰守優加獎勉激勵如能保旅順水陸各軍不吝封爵之賞該處各營勇丁自本月起月餉比向章加倍並准其酌量添募速解重金犒賞并多解軍火接濟我戰艦計已修好嚴飭海軍以全力夾擊援應或可固守是否可行伏候聖裁請代奏咸一

致總署天津李中堂

光緒二十年九月十五日已刻發

倭事日急我船太少非添船不可水師能戰則關沽無虞旅順可守英德各大國謹守局外無可商購昨令江

漢關稅司託人與南美洲小國駐美公使密商已接復
電巴西有上等水帶甲快船兩艘願售又阿堅廷有次
等兵船五艘願售有上等兵船六艘如重價當亦可商
購不如擇上等少購兩艘均包送來華然後換旗每艘
價須百萬兩以外礮火在內弁兵並可雇募葡萄牙窮
窘異常有大鐵甲一艘或亦可購土耳其不守局外有
鐵甲多艘可以利餌此款太鉅然權衡緩急欲購戰船
惟有借洋款可以速集擬請旨飭出使英美德大臣託
人與同駐該國之巴阿葡土各公使密商餌以厚利擇
其船身堅固礮火精良者速購數艘卽奏借洋款應付

兼募其弁兵投効并請飭赫德一面迅速密辦洋款本
非長策惟事急款鉅舍此難籌請敕王大臣暨北洋大
臣速議如意見僉同事可立斷早成一日早受一日之
益伏候聖裁請代奏咸二

李中堂來電

光緒二十年九月十六日酉刻到

咸兩電能見其大公若入贊樞廷事必有濟智利有
快船七艘願售包送內有四隻精堅極速奉旨飭龔
與議價但價必昂前有一隻允給四十五萬磅未購
是已需三百餘萬兩矣凡鐵快船上等總須四五十
萬鎊僅百餘萬似未盡之鴻已電請借洋債添船翁

謂上不爲然未知確否現擬令二赤借千萬矣倭兵
尙未在旅順後登岸謠言太多不可不防海軍趕修
只六船能出巡斷難大戰寒儉可愧鴻諫

致總署

光緒二十年九月二十日巳刻發

山海關與重現有兵力過單惟鐵字營新添之五營回
湘招募到鄂尙早余虎恩振字營新募尤遲到防均約
須三箇月竊思洞在鄂設有礮隊營係在各營原勇抽
出操練擬將此項礮隊添以新購車礮湊成四營卽就
鄂省防營中每營各撥勇丁二三百名不敷者加以新
募添足旬日卽可成軍一面配足槍械十餘日卽可啟

行委副將吳元愷統帶名爲愷字營派令赴山海關協防如此辦法成軍北上較速惟日久餉艱昨與湘撫吳電商鄂省籌墊發給三箇月餉以後餉卽歸吳撫處領給歸吳調遣吳覆電甚願照辦謹電達請旨如蒙俞允卽當趕速派撥北上其鄂省防營仍當照數募補請代奏號

致總署

光緒二十年九月二十五日寅刻發

購船最爲急務十五日曾經電奏茲飭江漢關穆和德查得巴西國有帶甲快船二艘可買一係商船改造上年造成載重五千噸艙面鋼板馬力四千匹速率廿二

海里裝煤三千三百噸有十五寸炸藥礮一尊十二生
一尊十生二尊小礮十七尊魚雷管四隨帶魚雷艇二
隻三生七機器礮二尊船身長三百八十英尺寬三十
八英尺喫水二十四英尺一係四年前造快船艙面鋼
板馬力二千八百匹速率十八海里載煤六百五十噸
有十二生礮二尊七生六礮二尊小礮十二尊魚雷管
五船身長二百六十英尺寬三十四英尺喫水十九英
尺兩船配件齊全俱有電燈經該稅司託人轉請美國
水師官二人查考稱係好船兩船連雷艇及備用子彈
甚多共價美國洋銀一百八十五萬六千元美洋每元

約合銀一兩似尙不貴此船礮不甚大而炸藥礮係新式力最猛可敵大礮此船催索復信甚急據云倭人亦擬購不知確否請旨飭使美楊大臣或令赫德迅速設法確加查驗是否合用如可用即與定議至此兩船應購與否伏候聖裁訓示請代奏有一

致總署

光緒二十年九月二十五日辰刻發

從前各省所購之械單響多快槍少倭械甚精非快槍快礮不能制勝現查禮和洋行有現成奧國新造小口徑五連珠快槍二萬枝每槍無煙藥彈一千德國新造小口徑五連珠快槍五千枝每槍無煙藥彈一千包運

上海竊思此等大批精槍機不可失需款雖鉅有此一批可濟各軍有餘矣謹請朝廷裁度如以爲可望速籌款定購飭上海道與之議價訂立合同并電奧德出使大臣到廠驗貨此項槍彈經鄂省委員在滬面議先付定銀三分之一餘俟貨到再付或墊一年給息五釐亦可近數日接該行電屢有更改云須先付半價起運時付清此由軍火日貴之故且係外省買故須現銀若奏旨定購總署飭上海道經理其墊款緩價決其必可允許卽或不墊亦必允貨到再付一半此起槍最精最多其包運又最穩墊款尤善此單到鄂已十餘日此時卽

或間有售去者所存必尙不少竊謂速定爲宜軍火市
情日變恐稍遲則數必分散不全矣請代奏請旨遵行
定購與否并祈飭洞知之以免兩歧有二

總署來電

光緒二十年九月二十七日戌刻到

本日奉旨張之洞電購買快槍請旨辦理等語卽著
該督詢明共值若干再議定購并定議後何時可以
運送到華卽電覆欽此

致總署

光緒二十年九月二十七日巳刻發

余虎恩十營現有兩營到餘三營陸續到前奉電旨令
湖北籌撥餉械自應欽遵惟鄂省供給北上諸軍已多

合計本省派往之吳提督鳳字營及鐵字營愷字營馬步共二十一營加以湘省經過之魏軍劉軍由鄂籌墊已三十餘萬兩再加定購各路軍火庫款如洗已向票號暫借銀十數萬約期歸還萬難再借此時籌無可籌借無可借焦灼萬分現與湘撫吳商余虎恩本係湘營應由南北兩省分任湖南籌餉湖北籌械現只須銀六萬其十營即可北行擬請旨敕湖南王護撫無論何款速籌銀六萬兩即日解鄂以應急需湖北軍械已搜羅一空現將各營收回者及向廣東江南借撥者儘力應付餘俟外洋購到撥給謹電奏請旨遵行不勝惶悚迫

切之至請代奏之洞繼洵同肅感

致總署

光緒二十年十月初四日已刻發

購買快槍一事前奉廿七日電旨當卽電囑上海道劉
麒祥就近詢明實價運期茲據覆稱禮和洋行奧槍二
萬已售去一萬二千枝現存八千枝尙不知外洋已賣
否每桿配彈千顆約價七十兩現瑞生洋行有比國連
珠小口毛瑟一萬枝配無煙彈一千萬限六十天到滬
槍價二十兩彈每千價四十七兩共價六十七萬兩須
畫押交半自比開船亦半如有一切險及無貨交皆退
價合同內均定明須從速定可就便輪槍可託龔欽使

驗看又有奧槍萬桿價與比槍同惟無現彈可配等語
查軍火市情日變禮和大批既已售散瑞生奧槍無彈
可配可置勿議惟瑞生比國槍萬枝亦是大批連珠小
口快槍與德奧槍同既保一切險到華又速既運到滬
以後總易設法可否請敕部籌撥的款先飭上海道就
近速與瑞生洋行議定此一萬枝以赴事機而制強敵
並請總署電飭劉道麒祥一面定購一面與商如能將
後半價銀存銀行俟貨到再付清尤善謹候聖裁請代
奏支

致總署

光緒二十年十月初五日午刻發

電旨恭悉前奉旨陛見當卽趕緊部署因北上諸軍本省及過境四十餘營需餉需械需輪無一不難尤苦無餉督同司道百計羅掘零星籌措始陸續開行尙未全開事繁款急兼須料理鐵廠槍礮廠諸務自九月初患瘡不能少坐日夜作字飲食皆須站立近日瘡稍愈而濕氣下注右足筋絡痛楚不能行立幸精神如常於籌辦各事無礙力疾趕辦晝夜不息僚屬共見現諸務粗有端緒定初八日起程由清江陸行北上其不能速行之故由於諸事趕辦爲難亦非因病無論病體如何初八日必行請代奏歌

總署來電

光緒二十年十月初四日亥刻到

奉旨前諭張之洞來京陛見日久未接覆電著卽迅速啟程北上毋稍延緩欽此紙

致總署

光緒二十年十月初五日亥刻發

本日電旨恭悉洞既奉旨署理兩江迅赴署任毋庸來京謹當欽遵擬仍於初八日啟行赴江甯俾江督劉得早日北上請代奏歌一

總署來電

光緒二十年十月初五日戌刻到

本日奉旨劉坤一著卽來京陛見兩江總督著張之洞署理迅赴署任毋庸來京欽此歌

致總署

光緒二十年十月初五日亥刻發

近日所調湘軍皆不能速一由新募一由隔湖拖渡甚艱時局日急宜早籌備調之事且湘鄂老營調出已多伏莽可慮已咨湖南提督婁雲慶移駐岳州鎮懾岳爲南北兩省咽喉距湘鄂均近該提督忠勇樸誠擬令精選健將速募六營卽駐岳州上緊訓練備用岳在洞庭湖之北萬一再有徵調到鄂甚便惟兩湖此時別無宿將婁斷不可離且志氣雖壯精力畧遜壯年該軍如須北上可令該提督另選統將率之此舉旣爲預備北地急用且可防維長江上游但宜寬以時日稍加訓練至

明之善名錄 卷十一
餉需如何籌撥應請旨敕湖南護撫籌酌能於部章捐
借項下籌措最善不敷者由部撥一款伏候聖裁請代
奏歌二

致總署

光緒二十年十月初七日戌刻發

初五日奉電旨當即電飭上海道劉麒祥欽遵辦理旋
接該道復電瑞生比國槍已售去五千祇存五千彈五
百萬惟該行接洋電有奧國五子連珠曼理夏槍二萬
枝無煙彈祇五百萬價同比槍從訂購之日起限七十
天到滬等語當又電飭該道即定比奧槍各五千枝彈
各五百萬合成槍一萬彈千萬之數務准七十天全行

到滬頃據覆稱蒙奏派職道定購槍件現與瑞生訂初九畫押應交規銀三十三萬五千兩求電戶部指撥另地亞士行有德國連珠槍五千桿彈五百萬價與瑞生同應否併購求示遵等語因德國亦係小口徑連珠快槍彈亦係無煙已飭該道將地亞士行之德槍五千彈五百萬一併定購既據稱價與瑞生槍同該價當是十三萬五千兩合瑞生槍萬枝共槍萬五千枝彈千五百萬共價一百萬零五千兩畫押之日卽應付定銀一半計五十萬零二千五百兩謹請飭部速如數撥交該道俾得付定以免他售請代奏陽

致總署

光緒二十年十月十一日午刻發

旅順設有疏虞則山海關可危北上諸軍無論如何催
趨到防總須在十一月初旬實因車馬缺極軍火難運
並非遲延無械則兵到亦無益查山海關礮臺聞止有
十五生礮二不能擊大船而關內關外一片平衍百餘
里處處可以登岸惟有掘長濠用車礮兩法可以急防
舳板登岸之陸兵擬請旨速飭已到諸軍於海濱可登
岸處沿海掘濠二道外濠引海水注之內兩濠伏兵用
槍伺擊外濠低內濠高卽以濠土堆作短牆可以藏兵
掘濠築壘一事無論兵勇強弱皆能爲之并可多雇民

夫助之晝夜趕辦數日可成再海岸必須有車礮方可
隨敵攻擊敵東則東敵西則西北洋車礮素多洞前在
粵購車礮一百八尊光緒十一年奏撥畿輔防軍之用
又光緒十五年奏購瓊廉海防大車礮數十尊亦經現
任粵督李解歸北洋卽此兩項已不少請敕北洋大臣
速撥礮隊赴山海關內外一帶嚴防或卽將車礮撥與
湘撫吳配用沿海現有鐵路如關緩而內地急仍可移
用詢考洋弁及老練將領惟有此兩策可以應急冒昧
上陳伏候聖裁速賜施行洞十一日到江甯請代奏真

致總署

光緒二十年十月十一日申刻發

南洋海防緊要備兵籌餉實關大局需才甚急求才甚艱查前任雷瓊道朱采乞病在湖州原籍聞病已愈精力甚健才守堅卓切實可信候選道黃遵憲現充新嘉坡總領事該員才識閱遠熟悉日本情形領事無甚要事仰懇聖恩將一員飭調赴速江南交洞差委必於時局大有裨益并請電敕出使英國大臣電知黃遵憲將總領事關防暫交委員代辦即日迅速回華五六日可到粵一面由臣電知該道速行江南防營北上已多廣東總兵李先義前已奉旨調赴湖北交洞差委洞今

來江擬卽令該鎮就近在粵募粵勇五六營來江設法
上緊訓練以資扼守與洋人戰粵勇較勝並請敕粵督
暫借餉項請旨遵行請代奏真二

致總署

光緒二十年十月十一日亥刻發

江漢關稅務司穆和德老成歷練素習兵事著有成書
洞曾閱過深懷忠悃情殷報効數月來於大局及鄂省
防務屢向洞籌畫陳言臨行時自言若將該洋員調充
鎮江稅司當盡其心力助洞練兵數營等語察其詞意
出於至誠查稅司薪俸各關大略相同鎮江並不優於
漢口且局面以漢口爲勝似可允許請旨敕總署飭總

稅務司赫德將穆和德迅卽電調鎮江刻日東下以資臂助實於防務有益請代奏真三

總署來電

光緒二十年十月十三日酉刻到

本日奉旨張之洞電奏調員差委等語朱采黃遵憲均著准其調用其新加坡總領事卽著該督電知龔照瑗改派所請李先義在粵募勇五六營赴江應需餉項著電商李瀚章借撥又請調江漢關稅務司穆和德已飭總理衙門傳知赫德辦理矣欽此元

致總署

光緒二十年十月十一日亥刻發

長江緊要提督係瓜州鎮總兵謝濬畚兼署該員資望

未深兼署日久不甚相宜與諸鎮相處諸多不便查提督彭楚漢爲現在水師宿將之冠戰功久著老成幹練衆望所歸聞該提督現已到京仰懇天恩可否卽令彭楚漢署理長江提督該提督亦能統帶陸師并可臨時酌量情形令其督率江陰等處礮臺陸營實於長江全局有益如蒙俞允請飭速來江南洞與本任江督劉相商意見相同是否有當伏候聖裁訓示請代奏真四

總署來電

光緒十年十月十四日亥刻到

本日奉旨張之洞電悉本日已降旨令彭楚漢署理長江水師提督矣欽此鹽

致總署

光緒二十年十月十五日午刻發

奉初十日電旨飭調陳軍及兵輪當與各將領籌商會稱徐州關繫四省伏莽素多陳鳳樓望深地熟此一軍萬不可調動衆口一詞洞詳加籌度與該鎮電商該鎮共統馬三營步兩營步營勇夫近年亦有裁減調發需時現今其派一得力將官統馬隊三營卽日馳赴天津候旨派撥馬隊赴機較速留該鎮在徐州令其照數另募填防訓練徐防亦可無慮至南洋四輪皆係木殼管帶旣非出色礮手又甚生疎現在正擬設法整頓若出海攻戰萬難得力徒然委之於敵有損無益洞與北洋

電商北洋亦深知其無用以後南洋各輪必須急加操練方可爲防江守口之用總之兵輪非洋將教之粵將率之斷難得力現正電商北洋酌派洋弁一面設法訪覓極力整頓請代奏咸

總署來電

光緒二十年十月初十日酉刻到

本日奉旨劉坤一奏陳鳳樓一軍難以抽調等語現在京畿防務緊要必須先其所急陳鳳樓一軍著張之洞仍飭令迅速北上徐屬需兵巡緝著該署督另籌調撥近日倭氛偏近旅順北洋戰艦不敷若得南洋四艘前來助勦較爲得力著張之洞酌量情形迅

速覆奏欽此蒸

又

光緒二十年十月十六日戌刻到

奉旨張之洞電悉陳鳳樓既須留防徐州卽著毋庸
來京其馬隊亦不必另行調撥餘依議欽此諫

致總署

光緒二十年十月十八日亥刻發

江南名爲財賦之區而江海兼防添營購械修理礮臺
整頓兵輪需款浩繁北上數十營每月驟增餉十餘萬
洞到任後切加綜核進款日絀急款無措地方捐款尙
無眉目焦急萬狀當與運司江人鏡籌商惟有鹽務尙
可籌款據該司面稟稱若能仿照光緒十七年籌捐部

餉百萬成案辦法向鹽商助捐照海防例給獎一年之內必可捐足百萬專備江南海防之用等語查既有光緒十七年成案可循所言捐數自屬可信詢考僚屬其勸捐之法款多而商不病此外實難籌此鉅款仰懇聖恩俯准照辦如蒙俞允奉到電旨後卽飭該運司趕速勸辦以濟眉急防務幸甚餉源幸甚請代奏嘯

致總署

光緒二十年十月十九日寅刻發

據探員稱聞英水提言本月十八九日倭兵船遣人至樂亭昌黎一帶測量水道等語寇勢狂悍若窺樂亭已在山海關以內擬請旨飭各防軍於此等處加意嚴防

派營督率民夫趕緊開掘重濠濠內多置絀礙之物或可稍助戰守外洋守礮臺守營壘打行仗皆以掘濠爲先務中國弁勇懶惰每大言不必掘濠此乃飾詞不足信伏懇朝廷切飭方能認真舉辦請代奏效此電並呈督辦軍務處

致總署

光緒二十年十月二十一日未刻發

江陰爲長江第一門戶查該處礮臺大礮皆係前膛舊式其後膛者皆係中等以下斷難攻擊敵船江督劉各處添臺添後膛礮不少此處因原有前膛大礮頗多正擬添購後膛而兵事已起此處設有疏虞關係大局此

時大礮萬萬無從購買訪知福建有前閩督卞購到後
膛二十八生四十倍口徑新式長礮二尊礮力極大而
極遠爲中國各省礮臺所無實爲今日至寶本係四尊
其二尊已安長門礮臺此二尊原擬安廈門礮臺因礮
到閩省起卸後已有海禁不能連往其廈門礮臺並未
造成此礮現放船政門外竊思江陰關繫長江數省全
局廈門僅此一隅倭未必到卽到亦尙無關大利害江
陰重廈門輕相去懸絕盡人皆知自在朝廷照鑒之中
仰懇聖恩俯念長江全局電旨密飭閩督譚將此礮
借與江南應用如蒙俞允洞當設法以重價雇洋船密

運一面將臺上地位備妥礮到卽行安置以後江南當
一面照式定購還閩尤望飭閩督千萬秘密勿稍洩洩
此出於萬不得已且閩省現在未用不勝迫切待命之
至請代奏馬

致總署

光緒二十年十月二十四日亥刻發

江南防務喫緊需員委用查有廣東在籍前海壇鎮總
兵吳奇勳湖北記名總兵俞厚安廣東候補道王秉恩
山東候補直隸州徐廣陞廣東副將林保遊擊丁志德
陳榮坤都司莫善積守備黃補文廣西遊擊黃守忠均
擬調來江南差委均與湖北廣東廣西督撫電商妥協

仰懇聖恩俯准飭俞厚安等十員迅來江南交臣差委俾資臂助實於防務有益請代奏敬

總署來電

光緒二十一年十月二十六日亥刻到

本日奉旨張之洞電奏江南防務喫緊需員委用所有廣東在籍前海壇鎮總兵吳奇勳湖北記名總兵俞厚安廣東候補道王秉恩山東候補直隸州徐廣陸廣東副將林保遊擊丁志德陳榮坤都司莫善積守備黃輔文廣西遊擊黃守忠等十員均著准其調赴江南差委卽由張之洞電知兩廣湖北山東各督撫分飭各員遵照欽此宥

致總署

光緒二十年十月二十四日亥刻發

吳淞江口與揚子江口均極關緊要上海製造局在租界外倭不允作爲局外該局爲南數省軍火命脈所關南洋有警必先攻此處南匯川沙寶山一帶海濱延袤百數十里小船皆可登岸不必由吳淞口即可擾製造局此前明倭寇上岸熟路且沿海財賦之區亦宜保衛吳淞口及獅子林兩處向有礮臺惟該處防營太少地闊兵單難資防禦查雲南提督馮子材七月內曾奉旨飭令北上洞深知其忠勇性成精力甚健屢與詢商近接電稱精力未衰尙堪策馬督戰等語忠壯義憤溢於

言表其銳意滅寇所志尤爲遠大仰懇聖恩敕馮子材募舊部粵勇十營速來江南辦理吳淞沿海等處防務洞前已奏明令總兵李先義募粵勇六營現擬令奏調之副將林保等續募六營到後均歸馮提督節制此軍專爲吳淞寶山川沙南匯一帶沿海遊擊之師阻其陸兵登岸兼可督飭吳淞獅林兩處礮臺將士認真扼守兼顧海濱江口粵勇素性猛悍若能依西法練熟此一軍屯駐上海將來用處甚多待我之戰艦漸多以洋將率粵勇大可出奇東渡雖不敢謂必能辦到然亦宜備此一著請代奏敬

致總署

光緒二十年十一月初六日辰刻發

初五日欽奉寄諭湖北煉鐵織布各局均令洞一手經理督飭前派各員妥辦自當欽遵惟諭旨內未言及槍礮廠事查槍礮廠地基廠屋卽包在鐵廠之內本係一事礙難劃分總辦道員蔡錫勇及緊要委員並繙譯機器匠首之類皆係兩廠兼管卽總管之洋匠白乃富亦係兩廠通籌工作則互相聯貫用款則互相出入且槍礮廠有奏定常年經費約三十五六萬兩鐵廠目前專恃此款爲挹注勉強支持騰挪若將槍礮廠劃出不歸鐵廠則款項早罄目前煉鐵廠卽須停工既無鋼鐵則

槍礮廠亦無從開造現在趕催廠屋以便迅速開造各
械俾應要需似斷無停緩之理查從前屢次奏案俱經
陳明鐵廠槍礮廠織布局三局合爲一事互相協助仰
懇天恩仍准查照原案將槍礮廠仍併歸鐵政局華洋
各員一手經理庶於諸事有益洞當竭力統籌督飭局
員妥速辦理以竟全功伏祈聖裁訓示請代奏語

致總署

光緒二十年十一月十四日辰刻發

茲有外洋運到北洋頭批軍火內有毛瑟一萬枝快槍
三百枝乃洞在鄂時訂購奏明供前敵之用現在南洋
喫緊已奉電旨嚴防日來屢有欲擾長江警信是江南

現爲前敵此閒向有各營精槍本少局造之械全數搜羅以給北上諸軍且有向各營收回者前督劉新添十營尙無軍械因緊要防所太多原營太少洞又添湘軍十數營及奏募粵軍二十二營皆無械可領恐不久卽有戰事徒手何以禦敵江南財賦之區關係甚鉅查此次許使所購之槍本爲前敵其款係出使經費並非北洋自籌北洋現已封河仰懇天恩准留此槍五千枝快槍三百枝於南洋以應急需如蒙恩准將此項槍一萬三百枝全數暫行留於江南尤於南洋全局有益以後洞訂購者尙多到後必當補運北路此一批北洋軍火

甚多且有南洋購馬梯尼五千已飭解赴北路並聞請
代奏鹽

總署來電

光緒二十年十一月十五日亥刻到

奉旨張之洞電奏請將外洋運到槍枝留於南洋等
語現在倭寇又陷復州意圖北竄前敵兵力尙單添
調各軍專待此項洋槍解到方能進發該督反以江
南爲前敵輒請截留應用實屬不顧大局著傳旨申
飭卽著該督催令迅速運解來京倘有延誤惟張之
洞是問欽此刪

致總署

光緒二十年十一月十八日辰刻發

十五十七兩日電旨恭悉曷勝惶悚且聞河冰未封倭寇北竄不勝髮指已轉電漕督常鎮道面告淮揚道飭縣欽遵多備船車迅運此批軍火洞因慮在滬日久有失疊次急電滬局多雇商輪派兵輪趕運或裝或拖并電北洋轉催十七日始到鎮江現已飭加雇船車不惜重價沿途添派員弁照料催趲惟件數繁重已極到清江日期容卽查詢此事現有糧臺胡臬司燭棗委員暨北洋轉運局經理不患其不上緊趕運惟在船車應手數月來兵差甚多車輛極缺皆在鄰省河南雇來近日益難惟有再向較遠州縣村莊加價雇覓奉旨詢此次

各件實數但知有洞在鄂奏由許使訂購之毛瑟一萬枝快槍三百枝并彈現已令全解北洋又南洋所購令并解赴北路馬梯尼五千七百枝其餘皆北洋所購共約萬餘箱不能詳知爲何物應請飭詢北洋再旬日來消息甚緊倭屢有卽擾長江之信已飭嚴備前電恐涉張皇致塵聖慮未敢上陳南洋原購馬梯尼一萬零四百枝馬槍一千枝前江督劉臨行時與洞議定南北各半前督劉批發李占椿五營一千萬本華五營一千楊文彪五營一千洞批發朱洪章五營一千蘇撫告急電撥五百崇明海外尤緊新募許發五百此各營皆原無

一槍者留半之槍大略已罄此外新添各營尙多或已到或未到皆無械可領只可俟續到再發此次並未敢截留應解北路之槍合併陳明請代奏嘯一

致總署

光緒二十年十一月十八日辰刻發

近日洋報洋商各領事皆云倭第三隊兵船日內將擾南洋或由川沙登岸擾製造局或由崇明以北路入長江或踞崇明爲巢穴英水師八艦已入吳淞其兵登岸護商消息極緊風鶴日聞看此情形恐不久卽有戰事已飭各營各臺嚴備惟洞到任止一月籌辦諸務晝夜不遑兵募而未到餉籌而未收械訂而未運大礮無從

購覓礮臺倉卒難改木質兵輪本難得力水師之將尤難急求蘇撫漕督上海道淮運司各鎮將州縣紛請撥營撥械實無以應之新募之營甫成未練甯滬兩局軍械盡給北上諸軍洋購者自造者均搜羅無遺江南地段太廣沿海沿江處處精華防不勝防自應嚴扼江口而江面太寬崇明以南吳淞礮臺係舊式不合法崇明以北入江之路向未設防江陰皆係前膛老礮江陰以外如川沙南匯一帶關繫滬局防營未備崇明孤懸海外倭若踞之扼長江之喉最爲危險倉卒斷無良策南岸許浦一帶爲入蘇門戶北洋通州一帶爲裏下河門

戶皆無礮臺防營崇明兩營而已現惟力籌築土臺攔江路募土勇用洋弁諸法如戰事在月餘後庶可趕辦地廣餉缺期迫種種棘手惟有督飭將吏竭力籌維相機備禦請代奏嘯二

致總署

光緒二十一年十一月十九日卯刻發

新械事十八日夜間已由電覆奏因十八日始接鎮江電知十七日全到鎮始敢覆奏又須查核實數本日酉刻又電奏詢明自鎮抵清江日期計均已上達頃奉本日電旨懷悉一切竊惟軍火一事洞向視爲最急之務在鄂尙屢電奏請急購械豈有械已運到反不速運况

疊奉嚴旨何敢玩視此次新械係北洋所包之洋船洞
聞到滬信卽屢電催速運鎮該洋行先云原船運鎮繼
云在滬換船剝運又云須候北洋電後又聞招商局欲
在滬起卸驗收再運鎮止用一船往返遞運其時已有
倭窺長江之信洞聞之焦急萬狀恐爲倭阻屢次嚴電
加雇商輪復派兵輪幫運並云如再延誤卽奏參仍恐
洞處呼應不靈復發急電與北洋及盛宣懷轉爲嚴催
此十二三四日事也於是數船或運或拖陸續入江十
八日接常鎮道電知十七日幸已平安抵鎮始敢覆奏
又須遵旨查核實數十八日連夜電奏電文較長比發

出已十九日黎明矣至嚴飭加雇車船派員趨運嘯電
已陳明總之此械係北洋包船閩所值一二百萬一聞
到滬信北洋卽委員至鎮坐待點收發運洋行承運貨
本甚鉅招商局係北洋主持兵事方急北洋大臣及駐
鎮北洋委員及前江督劉委員及招商局及洋行人人
皆利害切身焦急困憊晝夜趕辦斷不慮其遲延無如
笨重過甚件數叢雜剝運起卸點收又裝入民船層層
周折實爲艱困現所急惟在船事洞已遵旨疊電漕督
并嚴飭常鎮淮揚道縣加雇催運重費不惜前數日卽
有倭於十四日內擾南洋之信防務緊迫省外文武文

電紛集洞晝夜力疾經營并無喘息之暇惟有竭力催
運以冀早濟軍實稍慰宸廑再鎮江點收發運係道員
李經翊錢奎元清江轉運局係道員吳世榮徐州接運
係道員朱福春皆北洋所委合并上陳請代奏效

致總署

光緒二十年十一月十九日辰刻發

前奏電旨飭郭寶昌迅帶所部卓勝營勇全行北上據
該鎮面稱該鎮本係乞養人員已將十年老母年已九
旬冬令發病輒劇未敢遠離卓勝營勇僅一千二百人
分防皖北七州縣驟調空虛防所地方必留卽此千二
百人於事亦無濟且卓勝舊部將弁如王鳳鳴邵升堂

李華文劉思忠均爲程提督文炳調去宋朝儒又自帶
軍北上其營弁皆卓勝舊人近日有營官王四又爲程
調去此外別無舊部無得力營官則無可驅策如從緩
物色將才則不濟急如不論何營一概抽調則烏合徒
糜帑金與其敷衍貽誤何若先事陳明請代奏准回籍
養親等語復據具稟詞意相同旋即回里洞意總欲勸
行恐覆奏後或有窒礙多方令人詢勸其意如前謹據
情覆奏伏候聖裁請代奏效

致總署

光緒二十年十一月二十一日午刻發

南洋防務洋務需員孔亟擬請調湖北差委之記名提

督劉鶴齡張仲春湖南候補道陳允頤廣西候補道馮相榮來江以資臂助相應請旨飭調該員等迅來江南交洞差委實於防務洋務有裨請代奏馬

致總署

光緒二十年十一月二十一日未刻發

彭提督楚漢已到商定募陸勇十一營防江陰彭請調長江漢陽鎮高光効長江田鎮營副將許雲發爲分統卽令高與長江瓜州鎮謝溶畚互相調署許與長江江陰營副將李全彪互相調署因江陰卽係瓜州鎮所轄江陰又恰有長江水師江陰營如以高許調署卽水陸聯爲一氣洞與護湖督譚電商譚謂所籌極爲周妥謹

合詞電奏請旨遵行請代奏之洞繼洵同肅馬

總署來電

光緒二十年十一月二十二日亥刻到

奉旨張之洞等電奏已悉著照所請准其以漢陽鎮
總兵高光効與瓜州鎮總兵謝濬畚田鎮營副將許
雲發與江陰副將李全彪互相調署湖北差委之記
名提督劉鶴齡張仲春湖南候補道陳允頤廣西侯
補道馮相榮并准張之洞調赴江南差遣委用欽此
養

致總署

光緒二十年十一月二十三日戌刻自吳淞發

近日時有倭寇窺長江之謠洞於廿一日出省查閱沿

江海口礮臺布置營伍現到吳淞口約廿五六回省請
代奏濠

致總署

光緒二十年十二月初五日未刻發

奉旨調李占椿楊文彪萬本華十五營陳鳳樓馬隊三
營清淮馬隊兩三營赴山海關當卽欽遵分飭速行查
李萬兩軍現在江陰已卽日往調請代奏歌

致總署

光緒二十年十二月十一日申刻發

昨奉旨照劉大臣所請調江南省馬步二十一營北上
當已欽遵分飭速行惟江南防務情形不敢不據實陳
明長江爲東南門戶扼要在江陰鎮江兩處川沙至金

山與乍浦接界又爲蘇松沿海門戶爲上海製造局藩籬若寇擾長江無論財賦之區餉源所繫且外洋軍火均須入江由江陰鎮江運至清江此外再無他路以後正盼陸續運到接濟江陰鎮江若爲寇擾從此中國軍火直無接濟之法戰一日少一日南北諸軍從此束手豈不可危是江陰鎮江等處非特關係東南大局實關係關內關外前敵諸軍東征之大局也而海口沿江各礮臺洞帶同洋弁及出洋學習礮臺之員逐一查閱種種舛謬一地勢低窪失勢受敵一不占山頭敵襲後路踞高下擊全軍必潰一藥彈房淺露全無庇護中敵一

礮立燬一礮有鐵路本係可擊數面作門束之或前作
土牆遮之不能旋轉多擊一臺外土薄不能禦礮一多
礮密排一處敵擊傷一臺而眾礮廢一兩礮之間相距
較疏者亦不設隔堆一礮口之前有平臺與礮平廣數
丈長數十丈專接敵人礮彈發無不中一後靠山巖敵
彈炸石全落臺中一各臺外多無濠一臺上多修房屋
引火招敵江陰礮臺止有舊前膛大礮四尊造臺尤不
合法洋弁人人非議急圖補救總須得人該臺統領總
兵張景春駐臺二十年既不請添好礮舊臺舛謬又不
稟請修改布置妥善臨事守臺斷不可恃止可移作他

用游擊楊文彪曾在鎮南關征戰尙知礮臺作法正擬派該遊擊前往接管江陰礮臺趕緊酌量修改並先已飭會同鎮江守將修改鎮江各礮臺而劉大臣遠將楊文彪五營調去查外閒軍營習氣若非將領自能通曉自願如何布置雖有洋弁指授他人代謀斷不虛心聽從卽勉強照辦亦必不能切實周到目前江南各將領實無講求礮臺之人關係重大實深焦灼查近接上海道劉麒祥電稟劉大臣電致該道又欲將駐防川沙之副將張桂林五營調赴錦州此事並未奉旨劉亦並未電知洞處該將未便照辦竊思楊文彪旣通曉礮臺於

江南實爲切用張桂林旣經劉大臣擬調自必以爲得力楊張均係湘軍在劉視之當無區別擬請卽派張桂林五營北上而留楊文彪五營在江陰管理礮臺一轉移聞則此次所調仍是二十一營並無短少而於江南有益是否有當請旨遵行再總兵丁槐營勇前日甫全到鎮江已派輪送赴揚州該軍亦係五營丁槐亦能通曉礮臺作法如劉大臣不願留楊文彪在江南或卽令丁槐五營留江南令管江陰礮臺揚州內河舟行不能速發電調回甚易但丁槐於地營尤熟似仍以北上爲尤宜總之於此次所調二十一營之數仍無出入究應

如何辦理仰候聖裁訓示洞新募各軍遠在湘粵到防
尙早此次奉調多營通省防營除礮臺外寥寥無幾蘇
撫上海道江陰徐州地方官及省城各司道將領紛紛
電商面商僉擬量爲請留請緩擬俟新軍漸到再行洞
以奉旨未便請留覆之茲謹擬一轉移兼顧之法實爲
南北兼籌以顧前敵諸軍餉械來源起見請代奏眞

致總署

光緒二十年十二月十六日未刻發

據江南提督譚碧理咨轉據署蘇松鎮本任九江鎮總
兵朱淮森文稱現因傷病請假回省調理等語查蘇松
鎮缺向係駐劄崇明崇明孤懸海外關繫緊要朱淮森

如果有病早應請假如自揣才力不及夏秋閒亦可早爲陳明乃洞到任時該鎮來見尙無疾病因近日南洋防務消息日緊或傳有倭將據崇明之說正在設法布置該鎮遽於此時請假實屬迹近規避若皆紛紛效尤何以激勵將士但該鎮既係意存避敵毫無志氣留在該處亦必無益相應請旨將朱淮森以副將降補以爲前敵規避者戒若論軍律本應請予罷黜因念該員係多年老將姑予從輕且因循例摺奏稍遲是以電奏冀早奉諭旨可資激勵合併聲明請代奏諫

總署來電

光緒二十年十二月十八日丑刻到

奉旨現在防勦各軍需用槍礮甚繁盡向外洋購運
深恐緩不濟急湖北創設槍礮廠有年前降旨仍歸
張之洞一手經理并令督飭速辦刻下籌辦情形若
何能否及時擴充設法製造以便分撥應用卽著張
之洞迅籌復奏該督電奏朱淮森規避等情本日已
明降諭旨將該員以副將降補矣欽此

致總署

光緒二十年十二月十八日卯刻發

江南奉調北上諸軍共五十餘營皆江南供餉本省前
後節次新募共六十餘營北軍新增各費出於餉章之
外者甚多轉運費亦鉅本省防軍向係十關餉今因戒

嚴俱發足餉礮臺礮手又酌加至購辦軍械勦須巨款
計北軍每月約需二十餘萬本省每月約需二十餘萬
合計月需五十萬江甯屬捐借毫無眉目蘇州屬借款
尙有捐款甚難目前防務喫緊不敢惜費誤事捐借各
法必須緩辦此時先須固結民心若涉急擾亦非所宜
司道各局焦急艱難僉謂一時實難籌巨款惟有暫借
洋款一法方能應急臺灣唐署撫復多次函電切懇代
借極爲迫切惟洋款七八月間甚易數月來北路軍事
日急洋款頓起刁難一須論鎊一須多借總須數在一
百五十萬鎊以外一利息須七釐以上至八釐一須給

行用或扣五釐或扣九釐且多不願借據上海道劉麒
祥臺灣轉運臬司聶緝契疊次面稟電稟均大率相同
現飭委員與洋行籌議得一辦法德國伏爾鏗船廠克
虜伯礮廠均係極大富商中國購船礮向係該兩廠若
我肯用巨款購該兩廠船礮兩廠即可代借彼亦知中
國款絀願墊款代辦船礮給息六釐勻分二十年還清
假如我肯訂銀六百萬兩之船礮兩廠即可代借銀六
百萬兩再多亦可利息亦六釐亦均分二十年還就提
銀之日分別起利逐年利隨本減但均須論磅計船礮
墊款現銀借款兩項共約合一百七十萬磅以內行用

借款扣五釐亦分二十年攤交並不現扣購船礮款無
行用船礮允於一年內造成其中船礮較小者只數月
竊思此法於中國尙無所損蓋南洋必須練外海水師
一枝專用新式快船快礮此事雖十分支絀亦須籌辦
萬無游移然現款難籌該兩廠既肯墊辦又代借款專
就船礮款核計每年止還數十萬但六百萬金之船尙
不能成一枝不敷尙多以後籌定續添若干皆可令其
墊辦若軍餉所用不至六百萬有餘者卽全撥爲添購
船礮之用毫無虛糜至借款之數江南擬借四百萬兩
臺灣擬借二百萬兩俟銜價核明再商辦臺灣之款唐

署撫電稱臺借臺還願立案據但以臺灣孤危洋行不肯借故託江南代辦附借等語江南之款半爲奉調北軍用半爲本省用且長江關繫數省門戶江南借款似宜由沿江之江蘇安徽江西湖北湖南分別等差歸還至南洋水師可兼顧浙江船礮款似應并令浙江一同攤認應由戶部從容酌量分派目前既有洋款則戰事不致因缺餉而掣肘捐借亦不致以急感而擾民若俟軍事稍定尙可從容設法籌捐籌借徐圖抵補此時借洋款甚難若再遲緩恐以後借更難息更重矣此事日來始有眉目外洋周折尙多難免不小有參差謹先擬

辦法大略電奏如蒙俞允再與該行詳議確數辦法奏
陳奉旨後方爲定議合併聲明唐署撫屢電囑會銜電
奏謹合詞上陳請代奏張之洞奎俊唐景崧同肅嘯

致總署

光緒二十年十二月二十一日辰刻發

江南要地應防者太多近奉調多營尤須填劄新增各
營除已電奏外江南總兵朱洪章募十營防金山衛金
山與乍浦接距蘇松甚近最爲喫重總兵蕭鎮江添募
二營護上海製造局提督王衍慶募五營防崇明奏調
總兵張仲春募五營以備填劄下關楊文彪五營舊壘
奏調之提督劉鶴齡募六營以護清江以北運道奏調

之總兵俞厚安添募護軍三營除填補劉任調去一營外餘兩營分紮操練惟各營除朱蕭二軍漸次成軍外其餘到防尙早謹由電陳明請代奏馬

致總署

光緒二十年十二月二十七日卯刻發

聞倭大隊已在榮成縣登岸此專爲攻威海後路山海關外極寒倭知不能速進故撤大隊攻威海蓋平海城之倭俱撤退其情可見威海爲北洋屏蔽海軍停泊之所此處不守則北洋出路梗阻矣該處臺堅礮巨礮手亦好敵船不能攻故襲後路此攻旅順故智也戴宗騫數營止數守臺山東勇新募無精械不知能得力否若

派兵赴援路遠難致竊思惟有一策較近查陳鳳樓馬隊三營并率清淮馬隊兩營李占椿五營萬本華五營張國林五營共二十營奉調北上陳軍廿八九日自徐州行李萬兩軍近日約到清江張軍現租輪船自滬陸續分載來鎮江二三日內可到齊隨卽渡江北上李萬張三軍現經劉大臣電派李占椿爲總統總兵丁槐四營將抵沂州此時海蓋旣復關東較緩且諸軍尙多此二十營到關尙早似非急需似可卽令陳李兩鎮統此馬步二十營丁槐統本部四營由沂州府折而東北行出山東省城之南取道莒州等處直趨煙臺探明威海

後路相機援剿計程自清江抵煙臺約一千三四百里
軍行二十日可到此路州縣殷實擬請飭東撫飛飭多
備車輜尙可趕辦惟各軍械少李萬兩軍各有馬梯尼
千枝張國林有槍數百洋擡槍二十枝車礮四尊劈山
礮數十尊陳鳳樓因江南無馬槍須到津撥用江南新
購到馬槍千枝已全數解津交劉大臣行營丁槐軍直
無一槍查近數日內有北洋新到快槍四千吳幫辦快
槍數千皆已陸續北運將到清江可否請旨電飭北洋
大臣李幫辦吳商酌各借撥快槍若干分派委員并電
飭沿途照數提出交李軍丁軍分用劉大臣委員并電

飭沿途截留馬槍一千交陳軍用李陳丁均係得力將
領軍火若足必能一戰以後外洋若有運到好槍洞仍
當隨時運濟補還惟軍係新募每日到站後可略爲操
演且天氣嚴寒斷不能兼程速行以致疲病一面電飭
威海各營以重賞嚴罰激勵之若能逐倭下岸則威海
固倭計窮矣威海保全後仍可再令赴山海關洞爲事
機緊急威海重要謹抒管見以備朝廷采擇是否可行
統候聖裁非敢越俎妄言不勝惶悚請代奏感寅

張文襄公全集卷七十六終

吳縣周仰公校